




Sun Plaza Cafe

**GOOD FOOD
COZY ATMOSPHERE
BREAKFAST, LUNCH & DINNER**

118



HAPPY HOUR DI 4pm te 12pm cu POLAR y POLAR ICE

CLASSIC CARS, HARLEY MOTORCYCLE SHOW, MOTORCYCLE RACING TEAM

DIADOMINGO LIVE BAND CU MARISELA y MINITECA

Acuerdo ta acuerdo, ley ta ley, regla ta regla, no aki!!

Nos tin un tendencia di huzga hende, pa e manera cu nan ta bisti, pa manera cu nan ta cana, pa manera di nan estilo di cabey, pa manera di.....pa manera di.....

E dianan aki cu gaita ta resonando tur caminda, mey mey di esakinan, mi a scucha un cancion ritmo reggae, y canta na papiamento. Mi a keda encanta cu su mensahe cristian.

Mi a puntra mi yiu si e sa di e cancion, y el a bisami cu ta di Ricardo. Mi a puntre si ta e persona cabey largo, "dreadlocks" di rasta, y e contesta tabata "si".

Pami esaki tabata suficiente, pasobra e Ricardo ey, e rasta ey, e persona cu cabey largo ey, e persona cu su dreadlocks, ta un persona cu mi a tende di dje, mi a yega di conversa cune na telefon varios biaha, pero no cu mi conoce personalmente.

Ora mi a tende cu e cancion ta di dje, y di e grupo musical "Ilah" ("Sagrado" den dialecto africano), mi a bin haya sa cu e grupo ta consisti di Ricardo, su yiu y dos conocinan.

Un persona "rasta" di berdad, pero un persona trahador, decente, y na mes momento, un tata cu ta haci tur lo posibel pa ta ehemplar pa su 5 yiu y, masha devoto na su religion cristian.

Mi a keda encanta cu e cancion pa su mensahe y tambe pa motibo cu ta masha poco por tende un reggae canta na papiamento, y mas ainda cu mensahe cristian.

Den e conversacionnan cu mi a yega di tene na telefon cu Ricardo, mi a deduci cu ta trata aki di un persona inteligente y cu sa kico e ta papia ariba y masha respetable den su expresionnan.

Ta recientemente durante un entiero el a canta, y ora cu mi a puntra ta kende esey ta, mi a tende cu ta Ricardo.

Segun mi tin entendi, dentro di poco su grupo "Ilah" lo pone riba mercado un CD cu su cancionnan y cu mensahenan cu sigur lo habri wowo di hopi hende.

Esaki, si mi scucha kico e temanan ta y cu ta trata di cosnan cu ta tuma lugar riba nos isla combina cu mensahenan positivo.

Pa colmo, mi a bin haya sa cu organizadornan di Arubadag na Hulanda, a nenga e grupo aki di bin toca durante Arubadag, pasobra "reggae no ta pas ey nan y no ta di nos cultura".

Si esey ta e criteria, ta hopi di locual nos ta mira anualmente na Arubadag, no ta pas eynan tampoco y no ta di nos cultura musical tampoco.

Ta hopi aña caba ta tende e comentario aki cu cada Arubadag.

Pa 2004 mi lo tira un bista mas critico riba Arubadag, y pa e simannan venidero, mi lo spera riba e CD di "Ilah" cu lo habri conversacionnan tur caminda cu e verdad cu nos no kier mira ni scucha, segun e informacion cu mi a haya ..

Pabien Ricardo !

CON TA LUBIDA ASINA LIHE

Tirando un bista riba fechanan y kico tin e temponan aki, mi a cay riba e fecha di 1 di december, y ta marca "Chago."

Ya ta tres aña cu Chago Leo, a fayece.

E persona, e Arubiano, cu a pone Coastal funciona despues cu tur sorto di experto no tabata sa mas kico pa haci cu e heronan frustra unda tabata ex Lago.

Mi ta corda e tanto promesanan cu a ser haci na Chago y su familia. E caya of standplaats dilanti Coastal cu lo bay carga su nomber.

E promesanan cu a haci cu su familia a dorna cas na geel pa eleccion, tambe mi ta corda e palabranan di Oscar Wyatt di Coastal cu a expresa cu "di cada dollar cu dreña pa dia, mester corda riba Chago Leo".

Dialuna awor ta recorda aniversario di su fayecimento y e pregunta ta: "unda tur e promesanan a keda?"

NO TA PERMITI BANDANAN DI AFO

No ta mucho tempo pasa mi a skirbi riba e asunto di permiti bandanan di afo, despues cu ministro a laga sa cu a yega un fin na e dunamento pa loco di permiso pa bandanan di afo toca na Aruba.

A yega asina leu cu ministro y ASOMA a yega na acuerdo riba stipulacionnan pa permiti, of no, bandanan di afo, y cu ASOMA a bira consehero di ministro den e casonan aki.

Tempo cu a publica cu no ta duna permiso pa cierto periodo etc. mi a skirbi cu mi kier mira esaki pasobra ta yen di buraco cu ta keda habri.

Si ta pa hotelnan y tambe bao di capa di turismo, porta ta habri pa cuanto banda cu ta.

Djis usa e palabra magico "turismo" y banda ta dreña.

Permiso ta ser duna.

Tin tambe e stipulacion cu no ta laga ningun banda di afo dreña entre '1 di januari cu 10 di april. Esey pa mi tambe tabata parce un "farce" y te awor, pasobra e palabra "turismo" y e palabra "car-naval" lo bay pisa mas tanto.

E pelea entre e "brotherman", ministro y ASOMA, a cuminsa manera a lesa ayera, y e pelea lo bira mas fuerte ora cu ministro duna permiso pa bandanan musical di afo bin toca den carnaval 50. E ministro lo kibra tur e palabracionnan aki "na bienestar di turismo y di nos carnaval", pesey mi no a kere den e areglo logra.

E cos aki ta ponemi corda riba un frase cu Sr. Milo Croes a yega di bisami un temporada di carnaval: "Regels zijn er om gebroken te worden" y semper mi a tene esey den mente.

REGLANAN TA PA WORDO KIBRA

E frase aki riba a trecemi riba hospital.

Tin un malcontento grandi reinando den hospital y ministro di salubridad ta na altura di esey, a exige prueba, a haya prueba y ta awor pa e actua tambe.

Na hospital nan tin e personanan cu ta studiando y hopi di nan e aña venidero ta termina e estudio cu nan ta haciendo actualmente. Esakinan ta di e asina yama grupo H-2 cu ta e "hulp in de verpleging" di 2 aña. Tin tambe e grupo di prome aña.

E alumnonan aki (esnan cu a bin di pafu di hospital) ta gana 1200 florin pa luna studiando y ta traha cu patientnan.

Esnan cu a bin di den hospital mes, ta esnan cu ta gana 1500 pa 1800 florin pa luna.

Kico a pasa cu nan ?

Wel despues di reunion di servicio civil y hoofdverpleging, a dicidi cu e "afdeling assistentnan" cu no ta traha cu patient, pero ta haci cambernan bashi limpi, stof television y bentana, tene labamanonan limpi etc. ta haya trabao den hulpverpleging, sin cu nan tin e papelnan necesario, sin diploma.

Nan ta bay traha cu babynan y cria babynan y traha den verloskamer, y esnan cu tin nan papelnan ta keda afo.

Mas ainda ta cu esnan cu ta bay den e verpleging aki ta bay gana for di januari, 2800 florin y esnan cu ta haciendo e trabaonan aki y cu ta termina nan estudio na October, tin cu keda riba 1200, ya cu a congela nan salario y despues di October lo bay mira kico nan lo por gana pasobra "no tin placa". (ta unda e 500 milyon ta anto ?)

Minister di salubridad a ricibi cartanan riba e malcontento aki y tabata kier prueba, y segun mi tin entendi hasta lista el a haya di tur esnan cu ta wordo promovi di e manera aki, y den ki afdeling nan lo bay traha.

Loke por spera awor ta cu e conflicto aki lo bay cria un pia mas e dianan venidero, pasobra e hobennan y esnan cu a pasa di hospital mes pa e estudionan aki, sigur no ta contento cu e desaroyo, cu nan ta considera como un abuso contra nan.

Cu kende nan papia ?

Nan no por papia cu ningun hende pasobra den tempo di catibo, catibo no por a papia nada cu su amo, y nos ta den modernizacion di e situacion aki.

Mira con reglanan ta ser kibra pa privilegia otronan?

"Regels zijn er om gebroken te worden".

No bisami cu esaki tampoco ta berdad !

Juby Naar